

TE HEHEURAA API.

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Ua tuu maira Iehova i na papa ofai ia'u i reira; i papaihia e te rima o te Atua ra: o te mau parau a Iehova i parau mai ia outou i nia i te mou'a i rotopu i te auahi i te mahana apooraa ra, tei papaihia i nia ihora.” Deut. 9: 10.

Nu. 10.

10 Tiurai, 1909.

Mat. 2.

E Tino Anei to te Atua?

E piti pahonoraa tei tuuhia mai i mua i to tatou aro i nia i teie nei uiraa, oia hoi te pahono mai nei te tahi mau ekalesia, na ô maira, Aita to te Atua e tino, e te pahono mai nei te Ekalesia a Iesu Mesia, na ô maira, E, e tino to te Atua. Teihea te pahonoraa tia i na pahonoraa e piti nei? Te na ô nei te Bibilia:

“Ei te ture, ei te parau, ta ratou e imi; ia ore ia faaaui i ta ratou parau i taua parau ra, no te pouri ia i na reira'i ratou ra.” Isa. 8: 20.

Te “*ture*” e te “*parau*” i parauhia nei, tei roto ia i te Bibilia, oia hoi te mau ture a te Atua e te mau parau a te Atua i parauhia e ta'na mau tavini o tei uruhia e te Varua Maitai. A hi'o tatou i te parau a Setephano i nia i to tatou uiraa, e tavini mau oia na te Atua, “e taata i i te Varua Maitai e te faaroo.” Ohi. 6: 5.

“Ua na ô a'era oia, Inaha, te ite atura vau i te ra'i ua vevetehia, e te Tamaiti a te taata i te tiaraa i te rima atoa o te Atua ra.” Ohi. 7: 56.

Te parau ra Setephano, i muri roa'e i te revaraa o Iesu i nia, ua ite oia i te Tamaiti a te taata, oia hoi o Iesu Mesia,

i te tiaraa i te rima atau o te Atua. E rima anei to te Atua, e aore râ ua vare anei Setephano? E ere paha o Setephano tei vare, o te mau ekalesia râ tei vare, ua ruri ê ratou i te parau a te Atua, o ratou i parau ra e, aita to te Atua e tino; te na ô nei te irava i nia'e, oia hoi te irava e 55, "Ia'era oia i te Varna Maitai," oia hoi ua uruhia Setephano e te Varua Maitai a parau ai oia i te parau ra e,

"Inaha, te ite atura vau i te ra'i ua vevetehia, e te Tamaiti a te taata i te tiaraa i te rima atau o te Atua ra."

E aita te Varua Maitai e haavare. Mai te mea e rima atau to te Atua aita anei to'ua e rima aui e e tino atoa? E, e tino to te Atua, e ua hamanihia te taata i to'na ra hohoa. Gen. 1: 27. Teihea te parau e au ia tatou ia farii, te parau a Setephano e te parau a te mau ekalesia o tei parau e aita to te Atua e tino? Tei ia outou te farii i ta outou e hinaaro, te maitai e te ino, te parau mau e te haavare, e farii râ vau i te parau a te mau tavini o te Atua tei neneihia i roto i te Bibilia, o Setephano te tahi o taua mau tavini ra, ua ite oia i te rima atau o te Atua.

Te pari mai nei te mau ekalesia i te Ekalesia "Mormona" i te haapiiraa e e tino repo to te Atua. E tino repo anei to te Atua? Aita, e tino hanahana râ to'na o te ore e roohia mai e te tahuti. E hohoa anei te taata no te Atua? E, e hohoa te taata no te Atua, eiaha râ ei hohoa tia roa. E tino repo to te taata, e te vai ra te tau e ho'i to'na ra tino repo i te repo, no reira mai oia, na roto i te poheraa, e te vai atoa ra te tau e faatiahia to te taata râ tino i nia ei tino hanahana i roto i te tia-faahou-raa, o te ore e roohia-faahou-hia e te tahuti; e mai te mea ra e, ua haapao maitai oia i te mau ture a te Atua e ua noaa ia'na te mau maitai e vai i roto i te Atua, ei reira te taata e riro ai ei hohoa tia no te Atua.

Tera atoa mai te tahi "parau" no roto mai i te Bibilia tei faaiti papu mai e tino to te Atua. Ia faaau atoa tatou i to tatou mana'o i te reira e tia'i.

“Ua parau atura Mose, E faaite mai oe i to oe huru hanahana ra: ua parau maira oia. E tuu vau i te maitai atoa na’u ra na mua ia oe, e faaite au i te i’oa ra o Iehova na mua ia oe; te ite nei hoi au i ta’u i hinaaro i te ite, e te faaherehere nei au i ta’u i hinaaro i te faaherehere: ua na o maira râ oia, e ore oe e tia ia hi’o mai i ta’u mata; e ore roa hoi te hoê taata e ora ia na reira i te hi’o mai ia’u: ua parau mai râ Iehova, Inahâ teie nei vahi, i pihaiiho ia’u nei, ei tiaraa no oe i nia i te mato nei; e ia haere to’u nei huru hanahana na pihaiiho ra, e tuu atu vau ia oe i roto i te ta’oa mâtô ra, a tapoi atu ai au ia oe i tau rima, ia haere au na pihaiiho; e e iriti hoi au i tau rima, e e ite mai oe i tau tua; area tau mata, e ore roa ia e tia ia hi’o.” Exo. 33: 18-23.

E tua anei to te Atua? E rima anei e e mata anei To’na? Te na ô nei te Parau a te Atua, E, te na ô nei râ te mau ekalesia a te taata, Aita. Tei ia vai te parau mau? Teihea te mea maitai ia tatou ia farii, te Parau a te Atua e te parau a te mau ekalesia? Tei ia outou te farii i ta outou e hinaaro, te parau mau e te haavare, e farii râ vau i te Parau a te Atua i roto i te Bibilia, e faariro vau i te reira ei tiaraa no’u, no te mea te ite nei au e o te parau mau ana’e e tia i te vairaa a tau e a tau a hiti noa’tu.

Tera atoa mai te tahi parau a te Atua no roto mai i te Bibilia:

“Haere atura Mose, e o Aarona e o Nadaba, e o Abihu, e na matahiapo o Iseraela e hitu ahuru ra, i nia i te mou’a. Ite atura ratou i te anaana o te Atua o Iseraela, e mai te patu ofai saphira i raro a’e i tana avae, mai te ra’i mau ra te huru i te anaana.” Exo. 24: 9, 10.

E avae anei to te Atua, e aore râ ua vare anei o Mose ma e te hitu ahuru no Iseraela? Te parau nei Mose ma e te hitu ahuru no Iseraela i ta ratou i ite, te parau nei râ te mau ekalesia i to ratou mana’o, aita to te Atua e avae. Tei ia vai te parau mau? Teihea te parau e au ia tatou ia farii, te parau a Mose ma e te parau a te mau ekalesia? Tei ia outou te farii i ta outou e hinaaro, e farii râ vau i te parau a Mose ma ei parau mau, e avae to te Atua. Mai te mea, e rima, e e avae, e e mata, e e tua to te Atua, aita anei e tino to’na, e aita anei e mea tia te parau ra e,

“Hamani ihora hoi te Atua i te taata ma to’na ihora huru, i hamani oia ia’na ma te hoho’a o te Atua ra; i hamani oia ia raua, o te tane e te vahine.” Gen. 1: 27.

E, e tino to te Atua, E mea tia roa te parau a te Atua. Ua vare te mau ekalesia, te pee nei ratou i te parau a te taata, e te tupu nei â te parau a Paulo ia Timoteo, tei na ô ra e,

“Te vai atura hoi te tau e ore ai ratou e farii ai i te parau mau, no te anoenoe ra o to ratou tari’a, e haaputu ia ratou i te orometua i au i to ratou iho hinaaro; e fariu ê hoi to ratou tari’a i te parau mau, a opai tia atu ai i te fabula.” 2 Tim. 4: 3, 4.

E teie nei, e hoa ino ma e, e nafea tatou? E mea papu roa e te pirihaio te e’a i mua ia’u, te tamata nei au i te haere na te e’a o te Parau a te Atua. Tei ia outou te haere na te e’a ta outou i hinaaro, te e’a no te Parau a te Atua e te e’a e haerehia e te mau ekalesia. Te faaara nei râ vau ia outou ia ite outou e e mea ê te e’a no te Parau a te Atua e te e’a e haerehia e te mau ekalesia, o ratau te haapii hua e aita to te Atua e tino. O teie nei â te mahana e au ia outou ia maiti i ta outou e haamori, tē Atua tino ore o te mau ekalesia, e aore râ te Atua no Iseraela i itehia e Mose ma, e te hitu ahuru no Iseraela, e Stephano, e e vetahi atu â. Iosua 24: 15.—FARANI TUTERERA.

Tera mai te ohipa e au no te orometua mau, oia hoi ia faaite hua e te vai nei te Atua, eiaha te vai ra te Atua; e te parau mai nei â te Atua, eiaha ua parau maira te Atua.

Hoê â ia huru te amuraa i te maa pê piropiro e te feruriraa i te mau mana’o ino.

Mea maitai rahi te ite i te tao’a. Ua rahi râ te taata o tei imi i te tao’a e ua iti o tei imi i te ite.

“Tei te feia parau-tia ra to Iehova mata; e tei ta ratou pure to’na tari’a. E mata ê râ to Iehova i te feia i rave i te ino ra, e ia ore roa ia mana’ohia i te ao nei.”

Maitiraa Taata

*“Te faaroo nei matou e, ei taata maiti-mau-hia e te Atua * * * ia a’o i te Evanelia e ia faatere te mau ohipa no to’na ra toroa.”*

Te mau tavini a te Atua ra, oia hoi o ta’na ra mau peropheta i te mau anotau tahito ra. Aore roa ratou i rave noa i te ohipa a te Atua maori râ ua maiti-mau-hia ratou e ana. E no reira ua tia roa ia ratou ia rave i te ohipa o te Evanelia no te mea ua haamanahia ratou e Iehova. Mai tei parauhia ra e, “E aore roa e taata e rave noa i teie nei tura no’na iho, maori râ o tei parauhia e te Atua mai ia Aaron a ra.” Mai te aha ra te huru o to Aaron a parauraahia mai e te Atua ra? Teie ia, maori râ na roto i te parau heheu no te Atua. E no reira ei taata maiti-mau-hia oia, e ua tia roa ia’na ia rave i te mau ohipa no to’na ra toroa. Exo. 4: 14.

I te anotau o taua taata parau-tia ra, o Noa, ua ino roa te taata o te ao atoa nei, ua ino te mau mana’o atoa, e te mau opuaraa o te aau i te mau mahana atoa ra. E ua tatarahapa Iehova no te mea ua hamanihia te taata e A’na. E ua opuahia e A’na ia haamou te mau taata i nia i te fenua nei. Area o Noa, ua arohahia mai oia e Iehova. E ua a’o atu o Noa ia ratou i te Evanelia ia tatarahapa, aore hoi ratou i haapao i ta’na parau, ua roohia mai râ ratou i te riri rahi o te Atua ra. E ua parau maira Iehova ia Noa, ia hamani oia i te hoê pahi. E ua na reira hoi oia i te rave, mai ta Iehova i faaue mai ia’na ra. E oti a’era taua pahi i te hamanihia e ana ra, ua faaue maira te Atua ia’na e haere oia e to’na atoa ra fetii i roto i te pahi ra. E inaha, ua hopoi maira te diluvi i nia i te fenua ra, hope roa a’era te mau mea ora o te fenua i te pohe. No to ratou faaroo ore i te parau a te tavini mau a te Atua ra, ua faahapahia ratou e Iehova. E ua pohe roa a’era i to te ao atoa nei i te pae tino. E ua tapeahia’i i to ratou mau varua i te fare tapearaa mai te anotau o Noa ra e tae noa’tu i te poheraa o te

Mesia ra. E ua haere oia i reira, a'o atura i te Evanelia ia ratou peneia'e e noaa ia ratou i te tatarahapa, e e ora'i to ratou mau varua.

"I pohe na hoi te Mesia iho no te hara hoê poheraa, te taata parau-tia no te feia parau-tia ore, ia tae tatou ia'na i te Atua ra, i taparahi-pohe-mau-hia oia i te tino ra, i faaorahia râ e te Varua: o ta'na ia i a'o atu i te mau varua e vai i roto i te tapearaa i teie nei; o tei ore i faaroo i mutaa ihora, i te faaoromairaa roa o te Atua a tia ai i te anotau ia Noa ra, i te tarairaa i te pahi ra, i ora'i e toofanu pue taata i te moana, oia hoi na taata toovau ra." 1 Pet. 3: 18-20.

"I parau-atoa-hia'tu ai hoi te evanelia i te feia i pohe ra, i faahapahia atu ai ratou e te taata i te tino ra, te ora ra râ ratou i te Atua i te Varua ra." 1 Pet. 4: 6.

E teie nei, o te faaroo, e o te haapao hoi i te parau a te tavini maiti-mau-hia e te Atua, e ora ia, e o tei ore e faaroo râ, e faahapahia ia. Mai to te ao atoa ra i roohia mai ai i te pohe i te anotau o taua taata parau-tia, o Noa, no te mea ua riro taua parau no'na ra ei parau mau no ô mai i te Atua ra.

E taata maiti-mau-hia anei o Mose? Teie te pahonoraa, E. Ua fâ maira te Atua ia'na i roto i te pu aihere ra. E ua tonu atu te Atua ia'na ia Pharao ra, na ô atura, "A haere oe i Aiphiti e aratai mai te mau tamarii o Iseraela mai Aiphiti mai." No te mea ua tae roa te oto o te tamarii a Iseraela ia Iehova, e ua ite te Atua te hamani ino a to Aiphiti ia ratou, e ua faaroo te Atua i to ratou oto e te auê rahi. E no reira ua aroha maira Iehova ia ratou. E ua tae Mose ma i mua i te aro o Pharao. Parau atura ia'na, "Teie ta'u parau ia oe, a tuu mai oe i te mau tamarii a Iseraela ia haere mai ratou ia'u nei, e ia haamori ia'u." Ua faaeta-etahia te aau o Pharao, aore oia i tuu mai ia ratou. E e rave rahi te mau tapao ta Mose ma i rave i mua i te aro o Pharao, e no te pohe rahi i tuuhia mai i nia ia Aiphiti, ua tuu atu oia ia ratou ia haere ratou e haamori Iehova. Eaha te mea i tia'i ia Mose raua o Aarona ia rave i taua mau tapao rahi i mua i te aro o Pharao? Teie ia, no te mea ua maiti-

mau-hia raua e te Atua ra. E o tei patoi mai ia raua ra. Ua patoi mai ia i te Atua. E ua maiti-mau-hia te mau peropheta mai te anotau o Adamu e tae roa mai i te anotau o te Mesia e Iehova ra. E ua maitihia te mau aposetolo o te Mesia ra, e ua haamanahia ratou e ana. E ua faaue atura oia ia ratou e a'ohaere i te evanelia i te mau fenua atoa ra. E ua na ô atura, "O te faaroo, e o te bapetizohia e ora ia, area o te ore e faaroo ra e faahapahia ia." E ua rave ratou i te mau tapao e rave rahi, mai te faaora i te mau ma'i, e tamâ i te mau lepera e faatia i te pohe, e tiavaru i te mau demoni. Eaha te mea i tia'i ia ratou ia rave i taua mau tapao ra? Teie ia, ua maiti-mau-hia ratou e te Mesia ra. Luk. 6: 13-17. E ua tuu atu oia ia ratou i te mana ia rave ratou i taua mau tapao ra.

No te aha ra "e tapao rarahi hoi tei oti i te rima o Paulo i te Atua, ia hopoihia te ahu horoi utu, e te pareu no nia i to'na tino i te feia ma'i ra, e pee ê atura to ratou ma'i, e te mau varua iino atoa ua reva'tura ia i rapae au?" Tera mai te pahonora, no te mea e taata maiti-mau-hia oia e te Mesia ra; e ua tia roa ia'na ia rave i te mau ohipa no to'na toroa mai te mana. E nafea te taata o tei rave i te ohipa a te Atua ma te mana ore? Teie te parau ua roohia mai ratou i te riri rahi e te pohe a te Atua. Mai ta Kora ma i rave i te mea tia ore i mua i te aro o te Atua, e ua tupu to'na riri ia ratou. E e mea apî ta'na i rave ia ratou, oia hoi, ua haamâmâ te fenua nei i to'na vaha e ia horomii ia ratou, e ua pau ihora, topa ora noa ihora ratou i raro i te apoo, tapoihia maira, moe atura. Num. 16. A hi'o tatou i te hopea o tana arii ra o Uzia. Ua rave oia i te mea mo'a tia ore i roto i te hiero o te Atua ra. No te mea aita ona e mana ia haere i roto i te hiero o Iehova e tutui i te mea no'ano'a i nia i te fata no'ano'a ra, ua patoi atura te mau tahu'a ia'na, na ô atura, "E ere hoi oe i haapaohia e tutui i te mea no'ano'a na Iehova." Riri a'era Uzia ia ratou, e ua rave ihora oia i te hoê farii i ta'na rima, tutui i te mea

no'ano'a. E inaha, tupu ihora te lepera i nia ia'na. E ua vai maite â taua lepera i nia ia'na e tae noa'tu i to'na poheraa. Ua faautuahia mai oia e te Atua no te mea ua rave oia i te mea mo'a mai te mana ore. 2 Par. 26: 16-21. E nafea te taata o tei rave noa i te ohipa a te Atua mai te mana ore? E roohia mai ratou i te ati rahi no te mea te rave nei ratou i te mea tia ore i mua i te aro o te Atua. Mai te faaitohia mai, ua tamata'tura te hoê pae Ati Iuda ia tiavaru atura i te varua ino no roto mai i te feia roohia mai i taua varua ino ra, i te na ôraa'tu e, "Te faaue atu nei matou ia oe ma te i'oa o Iesu ta Paulo e parau haere nei." Ua parau maira te varua ino ra, "Ua ite au ia Iesu, ua ite hoi ia Paulo; o vai râ hoi outou na?" Ua ou'a maira taua taata tei roto ia'na taua varua ino ra i nia iho ia ratou, e pohe ihora ratou ia'na, e ua horo atura ratou i rapae au i taua fare ra ma te paruparu. Eaha ra e ore e tia ia ratou ia tiavaru atu taua varua ino ra i rapae au ra? Teie ia, no te mea aore roa ratou i parauhia maira e te Mesia, e ua faaue atura ratou i taua varua ino ra ma te mana ore. Inaha te hopea ra, pohe ihora ratou ia'na. Ohi. 19: 13.

E te mau ekalesia e, nohea mai to outou mana ia a'o atu i te evanelia nei? No te ra'i mai anei? E na te taata anei? A hi'opoa maite outou i te reira, no te mea te na ô mai te parau ra e, "*Aore roa e taata e rave noa i teie nei tura no'na iho, maori râ o tei parahia e te Atua mai ia Aaron a ra.*"—VILIAMU.

EIAHA E BAPETIZO I TE AIU

"Ua ora râ te tamarîi rii i te Mesia mai te haamauraa mai â o teie nei ao; Ahiri aita ia, ua riro te Atua ei Atua faatia pae tahi, e te faahuru ê, e te haapao i te huru o te taata; te rahi hoi o te tamarîi rii ra i pohe na aore i bapetizohia. * * * E o te parau mai e, ia bapetizohia te tamarîi rii e tia'i, o te huna ia i te arohia o te Mesia, e te faaore hoi i te taraehara na'na, e te mana o to'na ra ohipa faaora." Buka a Moromona, Moroni. 8: 12, 20.

Te A'oraa i Nia i te Mou'a Ra

"E ao to tei hamani-ino-hia i te parau-tia ra, no ratou hoi te basileia ra o te ao."

Te mana'o nei te mau ekalesia'toa a te taata nei, e taahi i nia iho e e tapoi atoa hoi i te parau a te Atua ia ore e tae atu ai i te tari'a no te mau taata o te hiaai i te maitai. Area râ no te faaoromai o te mau tavini a te Atua, ua tupu ta'na ra ohipa i te rahiraa, e ua noaa ia ratou ra te ite e te paari na roto i te faaoromai rahi. Te hamani ino nei hoi, o te tuhaa ia, a te mau taata parau-tia ra. Mai te mau mahana no Abela e tae noa mai i teie nei â, aita hoi te taata parau-tia e ere i te hamani ino no te mea ia faafatata mai outou i te Atua ra, ua mana'o te tahi e, Auê i te aroha e te feruriraa ore i taua mau taata ra, e mea haamâ i to outou haerea, e na roto i to outou puai i te haapii atu i te parau mau, e te parau haamaramarama i te taata nei, ua riro ia ei mea tâhitohitoraa i te mau taata o tei ore e faaroo ra. E no reira te ite nei te mau feia mo'a e hamani-ino-hia mai ratou e te enemi, no te mea aita hoi te hoê mau taata i ite i te Atua e aore râ te Tamaiti maori râ o outou ana'e. E no te ore ia ratou i ite i teie, ua ineine noa râ i te faaino atu e e taparahi pohe roa hoi ia outou. Ua na ô atu te Mesia i to'na mau pipi:

"E tuu ratou ia outou i rapae i te mau sunago ra; e te fatata mai nei hoi te hora e mana'o ai te taata e taparahi ia outou na e ua haamori oia i te Atua. E na reira mai ratou ia outou, no te mea aore ratou i ite i te Metua e ia'u hoi." Ioa. 16: 2, 3.

E no reira ua tupu te hamani ino ra na roto i te poiri i te mana'o e te feruriraa ore i te ohipa ta ratou i rave. Ua opua ratou e, e haaparare i te mau mea ta outou i faatupu a'e ei maitai no te huiratira o te fenua nei, oia hoi ia hinaaro outou ra e haapii atu i te taata, ua paruruhia, e ua opanihia ratou e te mau orometua a te taata nei, ia ore te parau a te Atua e tae atu i te tari'a no te mau taata o tei hiaai i te maitai. Ua haaparahihia ratou i roto i te poiri ia ore e ite mai i te maramarama ra o te evanelia nei. No reira te haapii atu nei ratou e, i te parau faanavenave e au i te tari'a

no te mau taata o teie nei ao, ei ravea e noaa te taata ia patoi mai i ta Iesu haapiiraa ia tonu atu Iesu i to'na mau pîpî. Ua haapii mai oia ia ratou na mua no te mea e, ua parau atu oia ia ratou e, "Inaha te tonu nei au ia outou mai te mamoe i rotopu i te mau luko ra, e mai te mea ia ore ratou e haapao i ta outou parau ia haere ê outou i taua vahi ra, e ueue atu i te repo o to outou avae." Aita paha te hoê taata i rotopu i te mau feia o tei patoi mai i te parau a te Atua o tei hamani ino mai ia outou o tei faaite mai i te tumu mau ua hamani-ino-hia mai. No te mea ua hamâ ratou ia parau mai e, no te evanelia ia, te tumu mau ia, area râ ua imi ratou i te hoê mau haavare ia pari mai i te mau tavini a te Atua ei ravea ia tapoi i te mata no te taata, ia ore ratou e imi i te tumu mau no te hamani ino i te mau tan atoa, mai te matamua mai â, ia faaroo te mau taata i te Evanelia a te Mesia, e e farii atoa i ta'na haapiiraa. Ua hamata te mau haapaoraa êê i te parau ra e te rave nei outou i te ohipa a te diabolô, e te mau taata i haapiihia i roto i taua haapaoraa, o ratou hoi ia te huru mau no Satani ra. I haapapu-maitai-hia'i teie i te mau mahana o te Mesia e tia noa ia te taata mata piri e ite, ia faafatata mai te taata i te Atua. Ua mana'o te mau haapaoraa tia ore ra, Auê te piri e te ite ore e, te huru mau outou i te Demoni rahi ra o Belezebuba. Te Mesia o tei parauhia e, te maramarama e te hanahana ra no to'na metua, ua parau te mau Ati Iuda e rave rahi o Iesu te Belezebuba, oia hoi te diabolô mau. No to ratou ite ore i te Mesia e ere oia te Tamaiti ra; ua mana'o e, e diabolô mau oia. E no reira, te mau feia mo'a no teie nei mau mahana hopea nei, eiaha outou e maere mai te mea ra e, e hamani-ino-hia mai ia outou e te enemi, ia faafatata outou i te Atua i te ao ra. Te mau huru peu a te mau taata hamani ino i teie nei mau mahana hopea nei, e te mau parau haavare i faatupuhia'i i rotopu ia ratou ra ei ravea ia e paruru ai te parau mau o te evanelia nei. Area râ, teie te mau mea ta te Fatu i parau mai e tupu e tia'i. No reira e tapao tera e pîpî mau outou na'na. E no reira a rohi a rave â tatou i te mau ohipa ta'na i rave, oia hoi tamau noa'i i te mau ohipa maitatai e tae noa'tu i te hopea e i te vahi ta'na e parahi ra, ei reira atoa outou na.— SOLONA.

Te Mau Parau Api.

A faaite atu i Te HEHEURAA APÎ i to taata tupu.

Teie te rahiraa o te mau puaatoro i roto i te Hau Amerika, oia hoi e 71,867,000.

Teie hoi te rahiraa o te mau puaa maohi i tupaihia, e i hoohia hoi i roto i te oire Chicago i te matahiti i mairi a'e nei, oia hoi 6,295,410.

Te patu nei i te oire o Roto Miti te hoê fare rahi tipaeraa. E fare tahua hoê ahuru ma piti. E te moni e pau i te hamaniraa o taua fare nei e piti milioni dara.

Ua faatoroa te hoê vahine i te oire rahi o Chicago ei môtui. E teie ta'na ohipa e rave, oia hoi ia tia'i maite oia i te tao'a i roto i te mau fare toa, ia ore ia eiâhia e te mau taata o te hoo haere i reira.

I te tereraa'tu i te hoê boti auahi i nia iho i te hoê anavai rahi i te fenua ra i te pae hitia o te râ i te hau Amerika, ua faai-roa-hia te boti i te taata, e no reira ua tomo te boti, e ua pohe roa na taata e 20 o tei haere na nia iho i taua boti nei.

Ua faaite mai te hoê orometua Porošetani te rahi o te feia Kerisetiano i taparahi pohe roa i te taata i te fenua ra o Asia Iti i te avae Eperera i mairi a'e nei, oia hoi 23,000. Ua ite mata oia no te mea ei reira to'na parahiraa. Na te feia haapaoraa Mohameda i rave taua ohipa ino taparahiraa taata faaitēhia mai.

Te hinaaro nei te tavana o te hoê tufaa fenua rahi i Ausaralia ia faaau te hoê ture ia faaore roa te peu puhupuhiraa avaaava, no te mea e peu ma'araraa moni e te hamani ino mai i te tino taata o tei rave noa i taua peu faufaa ore nei. I te matahiti i mairi a'e nei ua hamanihia na avaaava e 147 milioni e te mau taata i taua tufaa fenua ra.

I te avae ra o Me i mairi a'e nei, ua tae Teodora Roseveleta, oia te peresideni no te hau Amerika i te matahiti i mairi a'e nei, e ta'na tamaiti ra o Keremita Roseveleta, e te mau taata o tei pee atu ia raua ra, i te fenua ra o Aferika. E ua imi haere ratou i te mau puaa rarahi taehae roa o tei parahi noa i taua fenua ra. E ua iteahia e ratou. E ua pupuhi oia (Roseveleta) na liona e ono, e hoê elephana, e e piti terafa, e e rave rahi te mau puaa rii, e te mau manu pererau. E mea tano roa ta'na mau puhupuhiraa, aita roa e haperaa. E ua pupuhi atoa ta'na tamaiti e ua pohe roa hoê liona ia'na. E no reira ua oaoa raua no te mea ua manu'a to raua tere i taua fenua ra, oia hoi ua roaa mai na liona e hitu e ua rau te huru o te mau puaa rarahi, e te mau manu rii hoi ua roaa ia raua. E te imi haere noa nei â i teie nei.

Teie te taioraa o te mau taata i roto i te oire rahi o Nu Ati i te pae hitia o te râ o Amerika, oia hoi 4,422,685.

E 93 milioni maile te atea o te mahana i te fenua nei. E 8,000 maile te meumeu o te fenua nei, e 25,000 maile te haaatiraa.

I te avae ra o Me i te fenua ra o Paniola, ua roohia maira te tahi mau boti raavai i'a i te hoê vero rahi roa. E no te puai o taua vero ra, ua parari te tahi mau boti, e ua pohe roa na taata 100.

Teie te rahiraa o te mau moa e te tahi atu â mau manu pererau i faaapuhia i te Hau Amerika i te matahiti i mairi a'e nei, oia hoi 250,623,114. E aita nehenehe ia taio i te mau huero i tuuhia mai e ratou.

I te fenua ra o Nu Zilani i te mahana 20 no Me, ua topa te hoê tamarii e toru o'na matahiti, i roto i te hoê apoo pape hohonu, e e pae minute i muri a'era ua huti ia'na i nia mai raro mai i taua apoo ra, e na metua no'na ra, inaha ua pohe roa.

I te oire ra o Otago i Nu Zilani, i te 20 no Me, te haere atura na taata tootoru i te ohipa na nia iho i te purumu pereoo auahi i te haere. E inaha roohia maira ratou i te pereoo auahi. Pohe roa ihora te hoê. Ua ofati noa te avae no te tahi, e ua pêpê rahi te tino no te tahi ra.

Te hamani nei te Hau Amerika i te hoê fare vairaa parau reva. E 600 avae te teitei o taua fare ra, e e tia ia parau atu no nia iho ia'na na roto i te reva 3,000 maile i te atea, e e noaa mai te pahonoraa parau no ô mai i taua vahi atea ra. E mea maerehia hoi e te mau taata'toa ra, teie nei ravea parauraa reva.

Te rave noa nei â te Hau Amerika i te ohipa hamaniraa e'a pahi i te fenua i parauhia o Panama. Teie te rahi o te mau taata o te rave noa i te ohipa i reira i te mau mahana atoa, oia hoi 40,000. E mai te mea ra e, e rave noa i te ohipa mai te faaea ore e tae noa'tu i te matahiti 1915, e faaoti-roa-hia taua e'a pahi ra. E te faaite mai nei te hau te rahi o te moni i pau i te hamaniraa o taua e'a pahi ra, oia hoi 375 milioni dara. Teie te faito o taua e'a pahi ra, 46 maile i te roa, e e 500 avae i te aano, e e 55 avae te hohonu. E ia tere te pahi i taua e'a pahi ra, e haapoto-noa-hia to'na tereraa mai te oire Nu Ati e tae noa'tu i te oire San Francisco, 8,400 maile, e e haapoto noa oia i te tereraa pahi mai te oire Lonedona e tae noa'tu ia San Francisco, 6,000 maile.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.